



CONVENIO DE COLABORACIÓN ENTRE A XUNTA DE GALICIA, A TRAVÉS DA CONSELLERÍA DE POLÍTICA SOCIAL, E O CONCELLO DE SALVATERRA DO MIÑO PARA REFORMA DUN EDIFICIO PARA DESTINALO A CENTRO ONDE SE PRESTEN SERVIZOS DAS CARTEIRAS DE SERVIZOS DE PROMOCIÓN DA AUTONOMÍA E DE ATENCIÓN Á DEPENDENCIA.

Santiago de Compostela, na data da sinatura dixital

REUNIDOS

Dunha parte, a Consellería de Política Social, no seu nome e representación, Dona Fabiola García Martínez, nomeada polo Decreto 98/2018, do 26 setembro, que actúa no exercicio do seu cargo e en función das atribucións que a este lle confire o artigo 34 da Lei 1/1983, do 22 de febreiro, de normas reguladoras da Xunta de Galicia e da súa presidencia, no Decreto 88/2018, do 26 de setembro, polo que se establece a estrutura orgánica da Xunta de Galicia, e no Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra parte, o Concello de Salvaterra do Miño e, no seu nome e representación, a súa alcaldesa-presidenta, Dona Marta Valcárcel Gómez, actuando en nome e representación do referido concello, no exercicio das atribucións que lle confire o artigo 21 da Lei 7/1985, do 2 de abril, reguladora das bases do réxime local, o artigo 61 da Lei 5/1997, do 22 de xullo, de administración local de Galicia, e o artigo 24 do texto refundido das disposicións legais vixentes en materia de réxime local.

Todas as partes recoñécense, no concepto no que respectivamente interveñen, a capacidade legal suficiente para asinar o presente convenio de colaboración, e para o efecto





EXPOÑEN

1.- Que dentro do Programa de Desenvolvemento Rural Sostible, desenrolado a partir do Real Decreto 752/2010, do 4 de xuño, polo que se aprobou o primeiro programa de desenvolvemento rural sostible para o período 2010-2014 en aplicación da Lei 45/2007, do 13 de decembro para o desenvolvemento sostible do medio rural, aprobouse o plan de zona de Pontevedra este e sur. No documento, relativo ó espazo rural no que se atopa o Concello de Salvaterra do Miño, establecíanse como actuacións de reserva, non financiadas polo Plan pero susceptibles de ser activadas en caso de incrementarse as dispoñibilidades orzamentarias, a mellora das estruturas para a protección social do medio rural.

2.- Que estas actuacións, do primeiro nivel de reserva do Plan concretábanse no financiamento de proxectos destinados á posta en funcionamento de centros destinados á prestación de servizos sociais, co fin de incrementar as prazas dispoñibles destes recursos. A forma prevista para instrumentar estas actuacións cando os inmobles fosen titularidade das corporacións locais era o convenio de colaboración con estas.

3.- Que a execución do Plan de Desenvolvemento Rural e as dispoñibilidades orzamentarias deste impediron que se puidesen activar as actuacións en reserva, pese a persistir as necesidades que motivaron a previsión das mesma en dito plan. Estas razóns traen a causa do carácter prioritario da acción a desenvolver no concello de Salvaterra do Miño.

4.- Que existe un interese publico en complementar o plan de zona e cubrir as necesidades persistentes. Considerándose oportuno para isto a posta en marcha dun centro no Concello de Salvaterra do Miño que poida prestar un servizo de carácter asistencial e público no que as persoas maiores e/ou dependentes poidan recibir unha serie de coidados e atencións de carácter persoal, terapéutico e social.

5.- Que a Comunidade Autónoma de Galicia ten atribuídas en exclusiva as competencias en materia de asistencia social, de acordo coa Constitución española e o seu Estatuto de autonomía.





En base nesta competencia exclusiva aprobouse a Lei 13/2008, do 3 de decembro, de servizos sociais de Galicia, que lle atribúe a esta administración autonómica a planificación, ordenación e coordinación das políticas autonómicas de benestar e, entre elas, as referidas á atención ás persoas maiores e ás persoas en situación de dependencia.

6.- Que na Comunidade Autónoma de Galicia, o departamento encargado da planificación, ordenación e coordinación das políticas referidas á atención ás persoas maiores en situación de dependencia correspóndelle á Consellería de Política Social, en virtude do Decreto 176/2015, do 3 de decembro, polo que se establece a súa estrutura orgánica.

7.- Que de acordo co artigo 60 da Lei 13/2008, do 3 de decembro, de servizos sociais de Galicia, en relación co disposto nos artigos 10 a 13 deste mesmo texto legal, os concellos teñen atribuídas a creación, a xestión e o mantemento dos servizos sociais comunitarios, tanto básicos como específicos, aínda que o artigo 59.i) tamén atribúe á Xunta de Galicia a creación, mantemento e xestión dos centros e programas dos servizos sociais comunitarios específicos que, pola súa natureza, ámbito supramunicipal ou outras circunstancias, debidamente xustificadas no marco do Plan estratéxico de servizos sociais, asuma a Xunta de Galicia.

8.- Que segundo o artigo 64 deste mesmo texto normativo, a Xunta de Galicia deberá cooperar cos concellos coa finalidade de asegurar a calidade e unha cobertura equilibrada dos servizos sociais en todo o territorio, especialmente no que se refire á creación e mantemento dos servizos sociais comunitarios específicos.

Polo tanto, coa finalidade de mellorar a calidade de vida e o benestar das persoas do Concello de Salvaterra do Miño as partes comparecentes acordan formalizar o presente convenio de colaboración, con suxeición ás seguintes:

CLÁUSULAS:

PRIMEIRA.- Obxecto do convenio.

O obxecto deste convenio de colaboración é o de establecer as bases de colaboración entre as partes que o asinan para a execución da reforma dun edificio para destinalo a centro onde se presten servizos das carteiras de servizos de promoción da autonomía e de atención á dependencia, no Concello de Salvaterra do Miño, por un importe





estimado total de 50.000 €, mediante unha contribución máxima da consellería de 50.000 euros. As cantidades executadas que excedan deste importe serán por conta do concello; sen prexuízo do anterior, admitirase a variación dos importes inicialmente previstos para as partidas obxecto do convenio sempre que no seu conxunto non excedan do importe total.

O concello dispón dun local no lugar de Leirado que pretende destinar a realización de actividades para a promoción da autonomía persoal dos maiores que axuden a mantelos activos e preservar a saúde, así como a programas específicos de carácter preventivo e rehabilitador fronte a dependencia e discapacidade.

SEGUNDA.- Obrigas das partes.

a) Obrigas da Consellería de Política Social

1. A Consellería de Política Social comprométese a achegar, para o financiamento do investimento obxecto deste convenio, unha cantidade máxima de 50.000 euros durante a anualidade 2019, con cargo á aplicación orzamentaria 13.04.312E.761.0 dos orzamentos de gastos da Dirección Xeral de Maiores e Persoas con Discapacidade.
2. A Consellería de Política Social, a través da Dirección Xeral de Maiores e Persoas con Discapacidade tramitará, de ser o caso, as propostas de ordenación dos pagamentos correspondentes á execución do obxecto do presente convenio, a medida que a corporación local de Salvaterra do Miño presente os correspondentes xustificantes do investimento REALIZADO e acreditación do pagamento efectuado, segundo o especificado na cláusula cuarta.

b) Obrigas do Concello de Salvaterra do Miño

1. O concello comprométese a achegar as cantidades executadas que excedan do importe do investimento financiado pola Consellería de Política Social (50.000 €).
2. Para poder obter a condición de beneficiario desta subvención, o Concello de Salvaterra do Miño deberá reunir os requisitos establecidos no artigo 10 da Lei 9/2007, do 13 de xuño, de subvencións de Galicia. Ademais, a dita corporación





local tamén deberá cumprir coas obrigas que o artigo 11 da dita lei de subvencións de Galicia, establece para os beneficiarios destas subvencións.

Para acreditar o cumprimento da obriga de estar ao corrente no cumprimento das obrigas tributarias ou fronte á Seguridade Social ou de non ter pendente de pagamento ningunha outra débeda coa administración pública da Comunidade Autónoma de Galicia, bastará coa presentación dunha declaración responsable, segundo o indicado no artigo 11 do Regulamento da Lei 9/2007, do 13 de xuño, de subvencións de Galicia, aprobado polo Decreto 11/2009, do 8 de xaneiro. Este requisito de estar ao corrente no cumprimento das ditas obrigas, deberá acreditarse con carácter previo á sinatura deste convenio e tamén en cada un dos pagamentos da subvención. Ademais, sendo de aplicación o Decreto 193/2011, do 6 de outubro, polo que se regulan especialidades nas subvencións ás entidades locais galegas, o concello deberá cumprir o deber de remisión ó Consello de Contas das contas xerais de cada exercicio. A estes efectos a Consellería de Política Social, de oficio, comprobará o dito requisito.

3. O concello deberá aportar con carácter previo á formalización deste convenio testemuña do acordo adoptado polo órgano municipal competente sobre a disposición, libre de cargas e gravames, de tódolos terreos necesarios, con usos urbanísticos, para a normal execución das obras, así como os correspondentes permisos e autorizacións necesarios para levala a cabo.
4. O Concello de Salvaterra do Miño comprométese a tramitar, impulsar e levar a cabo todas as contratacións necesarias para que o investimento obxecto deste convenio se poida levar a cabo. Tamén se compromete a presentar ante a Dirección Xeral de Maiores e Persoas con Discapacidade da Consellería de Política Social, os contratos de obra, ou prestación do servizo que correspondan e a resolución de adxudicación do contrato, así como todos os xustificantes dos custos derivados da execución do dito investimento. O orzamento previsto para as partidas incluídas no obxecto de presente convenio poderán verse incrementadas con cargo as minoracións que, na mesma contía, se produzan nos procedementos de licitación do resto das partidas sen que en ningún caso o importe total de todas as partidas poida exceder do importe do investimento autorizado na cláusula primeira.





De acordo co artigo 29.3 da Lei 9/2007, do 13 de xuño, de subvencións de Galicia, cando o importe do gasto subvencionable supere as contías establecidas na Lei 9/2017, do 8 de novembro, de contratos do sector público, para o contrato menor, deberanse solicitar como mínimo tres ofertas de diferentes provedores, con carácter previo á contratación do compromiso para a obra, ou a prestación do servizo, salvo que polas súas especiais características non exista no mercado suficiente número de entidades que as realicen, ou presten, ou salvo que o gasto se realizase con anterioridade á solicitude da subvención.

En toda a cartelería referente a este investimento deberá reflectirse, en todo caso, que se trata dun proxecto financiado pola Xunta de Galicia.

5. O Concello de Salvaterra do Miño deberá sinalizar e identificar a “actuación” derivada deste convenio cos carteis e os logotipos da Xunta de Galicia e do Concello de Salvaterra do Miño que se especifican no Anexo I do presente convenio, de acordo coas súas respectivas normas de identidade corporativa.
6. Serán tamén obrigas do concello beneficiario as seguintes, recollidas no artigo 11 da Lei de subvencións de Galicia:
 - a) Cumprir o obxectivo, executar o proxecto, realizar a actividade ou adoptar o comportamento que fundamenta a concesión das subvencións.
 - b) Xustificar ante o órgano concedente, o cumprimento dos requisitos e das condicións, así como a realización da actividade e o cumprimento da finalidade que determinen a concesión ou o gozo da subvención.
 - c) Someterse ás actuacións de comprobación, que efectuará o órgano concedente, así como a calquera outra actuación, sexa de comprobación e control financeiro, que poidan realizar os órganos de control competentes, tanto autonómicos coma estatais ou comunitarios, para o que se achegará canta información lle sexa requirida no exercicio das actuacións anteriores.
 - d) Comunicarlle ao órgano concedente, a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentasen a concesión da subvención.





Esta comunicación deberá efectuarse no momento no que se coñeza e, en todo caso, con anterioridade á xustificación da aplicación dada aos fondos percibidos.

- e) Acreditar con anterioridade a que se dite a proposta de resolución de concesión que se encontra ao corrente no cumprimento das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración pública da Comunidade Autónoma, na forma que se determine regulamentariamente.
 - f) Dispoñer dos libros contables, rexistros dilixenciados e demais documentos debidamente auditados nos termos esixidos pola lexislación mercantil e sectorial aplicable ao beneficiario en cada caso, así como cantos estados contables e rexistros específicos sexan esixidos polas bases reguladoras das subvencións, coa finalidade de garantir o axeitado exercicio das facultades de comprobación e control.
 - g) Conservar os documentos xustificativos da aplicación dos fondos recibidos, incluídos os documentos electrónicos, en tanto poidan ser obxecto das actuacións de comprobación e control.
 - h) De conformidade co artigo 29.4.a) da Lei 9/2007, do 13 de xuño, de subvencións de Galicia, o Concello de Salvaterra do Miño deberá destinar os bens ó recurso do centro onde se presten servizos das carteiras de servizos de promoción da autonomía e de atención á dependencia, durante un mínimo de 5 anos no caso de bens inscribibles nun rexistro público e durante un mínimo de 2 anos para os restantes bens.
7. De conformidade co previsto no artigo 4 da Lei 1/2016, do 18 de xaneiro, de transparencia e bo goberno, o concello deberá cumprir as obrigas que sobre a subministración de información se poidan requirir. Para o caso do incumprimento desta obriga estarase ó disposto no artigo 4.4 da devandita lei.
8. O Concello de Salvaterra do Miño comprometese a entregar á Consellería de Política Social (Dirección Xeral de Maiores e Persoas con Discapacidade) toda a documentación que sexa precisa para os efectos de xustificar o investimento realizado.





9. O concello de Salvaterra de Miño tamén se compromete a que a subscripción deste convenio non supoña incremento de gasto para a Xunta de Galicia, co obxecto de atender os gastos de funcionamento do equipamento unha vez reformado.

A tales efectos e de acordo co artigo 68.2 da Lei 13/2008, do 3 de decembro de servizos sociais de Galicia, deberá aportar un plan de viabilidade económica do concello, con informe favorable da persoa que exerza a intervención da entidade local, no que se garanta a sustentabilidade financeira das novas actividades económicas.

TERCEIRA.- Publicidade.

O presente convenio será obxecto de publicidade e inscrición de conformidade co disposto no artigo 15 da Lei 1/2016, do 18 de transparencia e bo goberno e no Decreto 126/2006, do 20 de xullo, polo que se regula o rexistro de convenios da Xunta de Galicia. Asimesmo, será obxecto de publicación e inscrición en cumprimento do disposto no artigo 17 da Lei 1/2018, do 18 de xaneiro, o artigo 15 da Lei 9/2007, do 13 de xuño e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de orzamentos xerais da Comunidade Autónoma de Galicia para o ano 2006.

As partes asinantes consenten na publicidade dos seus datos persoais e demais especificacións incluídas no presente convenio de colaboración no Portal da Transparencia e Goberno Aberto.

De conformidade coa Lei 38/2003, do 17 de novembro, xeral de subvencións, o presente convenio e a información sobre a subvención serán comunicados á Base de datos nacional de subvencións (BDNS).

CUARTA.- Xustificación e forma de pagamento.

A Dirección Xeral de Maiores e Persoas con Discapacidade efectuará o pagamento das contías comprometidas en favor do Concello de Salvaterra do Miño para o exercicio, unha vez que o concello teña contabilizado o recoñecemento das obrigas polo órgano competente da entidade local. Para o cal, con carácter preferente, deberá achegar os certificados de obra e demais facturas referentes ao gasto realizado para a execución deste investimento, que deberán ir acompañadas dunha certificación expedida polo órgano correspondente da corporación local beneficiaria, acreditativa da súa aprobación polo órgano competente.





De acordo co anterior, ao abeiro do previsto no artigo 31.6 da Lei 9/2007, do 13 de xuño, de subvencións de Galicia e nos artigos 62 e 63 do regulamento que a desenvolve, aprobado por Decreto 11/2009, do 8 de xaneiro, efectuaranse pagamentos anticipados e pagamentos á conta (pagamentos fraccionados que responden ao ritmo de execución das accións subvencionadas) á favor do Concello de Salvaterra do Miño. Os pagamentos anticipados poderán chegar ata o 50% do importe do convenio sen que se supere o importe da anualidade prevista para o exercicio orzamentario. O importe conxunto dos pagamentos á conta e dos pagamentos anticipados que, se é o caso, se concedesen non poderá exceder o 80% da porcentaxe subvencionada correspondente aos pagamentos xustificados. Os pagamentos á conta efectuaranse contra xustificantes de gasto (facturas) acreditativos dos gastos de execución do investimento subvencionado, aos que deberán xuntar certificación do órgano que teña atribuídas na devandita entidade as facultades de control da toma de razón en contabilidade do recoñecemento da obriga polos citados importes e do cumprimento da finalidade para a que foi concedida a subvención, así como unha declaración de estar ao corrente no cumprimento das obrigas tributarias e fronte á Seguridade Social e de non ter pendente de pagamento ningunha outra débeda coa administración pública da Comunidade Autónoma de Galicia. Aos efectos do previsto no artigo 45 do Decreto 11/2009, do 8 de xaneiro, o Concello de Salvaterra do Miño, deberá presentar estes xustificantes ante a Dirección Xeral de Maiores e Persoas con Discapacidade da Consellería de Política Social, na data límite do 15 de decembro do 2019.

A porcentaxe da subvención pendente de aboar, tras os pagamentos anticipados e á conta, será satisfeita cando o concello achegue xustificantes de gasto e certificación do órgano que teña atribuídas na dita entidade as correspondentes facultades de control da toma de razón en contabilidade do recoñecemento da obriga polo importe total da actuación subvencionada así como do cumprimento da finalidade para a que esta foi concedida.

En todo caso, como xustificación final da subvención e como requisito para a tramitación do derradeiro pagamento, o Concello de Salvaterra do Miño deberá aportar a declaración responsable de estar ao corrente no cumprimento das obrigas tributarias e fronte á Seguridade Social e de non ter pendente de pagamento ningunha outra débeda coa administración pública da Comunidade Autónoma.





Coa documentación xustificativa acreditativa de cada un dos pagamentos, a corporación local de Salvaterra do Miño deberá indicar expresamente se está a presentar unha xustificación parcial e a solicitar, en consecuencia, o correspondente pagamento parcial, ou se, pola contra, está a presentar a xustificación total ou final do investimento financiado e a solicitar, en consecuencia, o correspondente pagamento total ou final.

Cando se trate da xustificación total ou final do investimento subvencionado, e antes do derradeiro pagamento, a dita corporación local deberá presentar unha certificación complementaria, emitida polo órgano correspondente da corporación local (intervención ou órgano que teña atribuídas as facultades de control da toma de razón en contabilidade), que faga constar expresamente que o importe da transferencia realizada foi destinado á súa finalidade, acompañada dun informe do técnico municipal competente, no cal se certifique expresamente que a obra se executou segundo o proxecto aprobado que serviu de base á transferencia, que cumpre coa legalidade vixente en materia de seguridade e co resto da lexislación de xeral aplicación.

Este informe deberá ser visado polo alcalde-presidente da citada corporación municipal.

Coa conta xustificativa da subvención, ademais da documentación indicada nos puntos anteriores, segundo o artigo 10 do Decreto 193/2011, do 6 de outubro, deberá achegar a certificación expedida pola Secretaría da entidade local, co visto e prace da alcaldesa, relativa á aprobación do órgano competente da conta xustificativa da subvención na que se faga constar o contido detallado no citado precepto. Igualmente, de ser o caso, deberá presentar a restante documentación á que fai referencia o mencionado artigo, en especial, os tres orzamentos que se exixen en aplicación do artigo 29.3º da Lei 9/2007, do 13 de xuño de subvencións de Galicia.

O Concello de Salvaterra do Miño sempre estará obrigado a acreditar documentalmente, no prazo de sesenta días naturais contados a partir da data do ingreso na súa conta bancaria, a efectividade dos pagamentos realizados polo dito concello, correspondentes aos aboamentos destinados ao financiamento da execución do dito investimento.





A corporación local tamén estará obrigada a achegar toda a documentación xustificativa que se lle requira, correspondente ao investimento obxecto deste convenio, para a súa xustificación.

A contía concedida á corporación local, en virtude deste convenio de colaboración, para financiar a execución do investimento, será compatible con outras subvencións, axudas, ingresos ou recursos para a mesma finalidade, procedentes de calquera administración ou entes públicos ou privados, nacionais, tendo en conta que o importe da subvención en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada, segundo o establecido no artigo 17.2 e 17.3 da Lei 9/2007, do 13 de xuño, de subvencións de Galicia.

A dita documentación xustificativa poderá incluír os gastos derivados da execución do dito investimento que se orixinasen con anterioridade á data da sinatura do convenio, sempre que se comprometeran no exercicio orzamentario corrente.

Segundo o artigo 3.2 do Decreto 193/2011, do 6 de outubro, no caso de que se realizaran pagamentos anticipados á entidade local como financiamento necesario para poder levar a cabo as actuacións subvencionadas, considerarase gasto realizado o que foi efectivamente pagado pola entidade beneficiaria con anterioridade á finalización do período de xustificación.

No caso de que o Concello de Salvaterra do Miño non cumpra coas condicións establecidas neste convenio de colaboración para obter o financiamento para a execución do investimento, procederá o reintegro das cantidades percibidas e a esixencia do xuro de mora correspondente, dende o momento do pagamento da subvención ata a data na que se acorde a procedencia do reintegro, nos supostos e na forma establecidos no artigo 33 a 38 da Lei 9/2007, do 13 de xuño, de subvencións de Galicia.

QUINTA.- Compatibilidade con outras axudas

A subvención prevista neste convenio é compatible con outras subvencións, axudas, ingresos ou recursos para a mesma finalidade, procedentes de calquera





Administración ou entes públicos ou privados, nacionais, da Unión Europea ou de organismos internacionais.

O importe da subvención en ningún caso poderá ser de tal contía que, illadamente ou en concorrencia con subvencións ou axudas doutras administracións públicas ou doutros entes públicos ou privados, nacionais ou internacionais, supere o custo total da actividade que vai desenvolver o beneficiario.

SEXTA.- Modificación e resolución do convenio.

a) Modificación do convenio.

As partes asinantes, poderán solicitar a modificación do presente convenio no seo da comisión de seguimento establecida na cláusula sexta do presente convenio. De acordarse a modificación, esta formalizarase a través dun instrumento que será asinado polas partes convenientes.

b) Resolución do convenio.

Serán causas de resolución do presente convenio e procederá, se é o caso, o reintegro total ou parcial da axuda percibida e os xuros de mora reportados dende o momento do seu pagamento, ata a data na que se acorde a procedencia do reintegro, os supostos previstos no artigo 33 da Lei 9/2007, do 13 de xuño de subvencións de Galicia.

Así mesmo, serán causas de resolución as seguintes:

- A denuncia de calquera das partes formulada expresamente cunha antelación mínima dun mes.
- O mutuo acordo das partes.
- O incumprimento das cláusulas do presente convenio, en particular, as obrigas das partes establecidas na cláusula segunda deste.
- Cando resulte inviable a realización das actuacións descritas no convenio por causas non imputables ás partes ou por se producir cambios normativos que afecten substancialmente ás disposicións vixentes a súa sinatura, que ampararon a súa subscrición.





SÉTIMA.- Subcontratación

O concello de Salvaterra de Miño é o beneficiaria directa da subvención obxecto deste convenio, asumindo a total responsabilidade da execución da actividade subvencionada fronte á administración. Non obstante, autorízase a subcontratación da execución parcial de actividades, ata unha porcentaxe do 70 por cento do importe total das actuacións financiadas a través deste convenio,.

O concello de Salvaterra de Miño no seu caso, comunicará, a subcontratación á Dirección Xeral de Maiores e Persoas con Discapacidade da Consellería de Política Social. A estes efectos será de aplicación o establecido no artigo 29 da Lei 38/2003, do 17 de novembro, xeral de subvencións e 27 da Lei 9/2007, do 13 de xuño, de subvencións de Galicia.

OITAVA.- Comisión de seguimento.

Para o seguimento e coordinación das accións previstas no presente convenio de colaboración crearase unha comisión mixta e paritaria na que estarán representadas cada unha das entidades afectadas polo mesmo. Esta comisión, que se reunirá por petición de calquera das partes, será convocada por orde da súa presidencia e será o mecanismo de actuación conxunta para levar a cabo o seguimento e avaliación das actuacións previstas no presente convenio. Estará formada, por parte da Consellería de Política Social, por dous/dúas representantes designados/as pola Dirección Xeral do Maiores e Persoas con Discapacidade e, por parte do Concello de Salvaterra do Miño por dous/dúas representantes designados/as polo Concello. A dita comisión será presidida por un dos representantes da Consellería de Política Social.

Non obstante, todas aquelas cuestións que se susciten en relación co outorgamento, cumprimento, xustificación e pagamento, así como o reintegro e determinación das posibles responsabilidades relativa á subvención concedida, serán resoltas pola Consellería de Política Social.

Como órgano colexiado a comisión someterase ao réxime establecido na Lei 40/2015, do 1 de outubro de réxime xurídico do sector público e na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.





NÓVENA.- Duración do convenio.

O presente convenio entrará en vigor o día da súa sinatura, e estará en vigor ata o 31 de decembro do ano 2019.

DÉCIMA.- Natureza do convenio.

Este convenio ten natureza administrativa e rexerase polo disposto na Lei 9/2007, do 13 de xuño, de subvencións de Galicia, así como polo regulamento que a desenvolve, aprobado polo Decreto 11/2009, do 8 de xaneiro, polo Decreto 193/2011, do 6 de outubro, polo que se regulan especialidades nas subvencións ás entidades locais galegas e tamén pola Lei 39/2015, do 1 de outubro, do procedemento administrativo común das administracións públicas e a Lei 40/2015, do 1 de outubro, do réxime xurídico do sector público. Para resolver as dúbidas ou lagoas que puideran presentarse, serán tamén de aplicación os principios contidos na Lei 9/2017, do 8 de novembro, de contratos do sector público.

Correspóndelle á Consellería de Política Social a resolución das cuestións litixiosas que poidan xurdir na interpretación, modificación e resolución do presente convenio, e os seus acordos poñen fin á vía administrativa. Contra os mesmos cabe interpoñer o recurso potestativo de reposición ou recurso contencioso-administrativo de conformidade co disposto na Lei 39/2015, do 1 de outubro, do procedemento administrativo común das administracións públicas e na Lei 29/1998, do 13 de xullo, reguladora da xurisdición contencioso-administrativa.

E en proba de conformidade cos termos deste convenio, as partes comparecentes asinan e rubrican, por triplicado, este exemplar no lugar e data que se indica no encabezamento.

A CONSELLEIRA DE POLÍTICA
SOCIAL

A ALCALDESA-PRESIDENTA
DO CONCELLO DE
SALVATERRA DO MIÑO

Fabiola García Martínez

Marta Valcárcel Gómez





ANEXO I

LOGOTIPOS E MODELOS A UTILIZAR NAS ACTUACIÓNS DE
INFORMACIÓN, PUBLICIDADE, DIFUSIÓN



**XUNTA
DE GALICIA**

